

Masfjorden Bonde og Småbrukarlag

Masfjorden kommune

Austfjordvegen 2724

5981 Masfjordnes

16.04.2020

Høyringsuttale til strategiplan 2020 – 23 for bruk av landbruksmidlar i Masfjorden kommune.

Masfjorden Bonde og Småbrukarlag er glade for at kommunen tek tak i desse nye oppgåvene og at arbeidet med strategiplanen er kome i gang raskt. Småbrukarlaget uttalar seg om dei ordningane som vedkjem landbruk.

Me har ingen merknader til dei generelle prioriteringane og presiseringane, men støttar og bed om at midlane blir brukte slik dei er tenkte til aktive gardsbruk. Som statistikken viser, har talet på dei fleste husdyr og bruk i drift vore ganske jamt dei siste åra. Det er bra og vårt ynskje er at bruken av desse midlane kan bidra til at landbruket i Masfjorden kan halda fram, minst på dagens nivå.

Som høyringa seier har dei aktuelle ordningane vore populære og me ser ikkje at det trengs å gjera store endringar. Me vil likevel ha med nokre presiseringar.

- Midlane må i minst mogeleg grad føra til meirarbeid for søkjaren. Midlane må mao. knytast opp mot tiltak som er ein del av den daglege drifta, men der ein får ei ekstra støtte for å gjera ein innsats som viser att både i kulturlandskap, i betra miljøtilhøve og betre lønsemd for den enkelte gardbrukar. Dei fleste har rikeleg med arbeid og blir ikkje motiverte om dei ikkje og ser resultata att på eige gardsbruk. Dei neste punkta er døme på dette.
- Lyssiv og knappsiv er etter kvart blitt det mest utfordrande ugraset i jordbruket i Masfjorden. Sjølv om dette i høyringa er definert som ordinær landbruksdrift, er dette ugraset så skjemmande for kulturlandskapet at ein bør kunna kvalifisera til desse midlane. At det trengjer vekk kulturplantane gjer at med nokre økonomiske insentiv, kan ein ta jobben med å fjerna det i staden for å t. d. kjøpa fôr jf. førre punkt.

Me vil oppmoda om at det blir sett på ein modell der ein kan få støtte til å bekjempa desse ugrasa både kjemisk og mekanisk. Me er klar over at utbreiinga til ein viss grad heng saman med drenering, så ein må gjerne sjå på ei kopling mot dette.

- Me vil og be om at det blir gjeve kommunale tilskot til drenering av dyrka mark. Den støtta ein får i dag er ikkje nok til å gå i gang med større dreneringsarbeid. Etter 70 år med traktordrift er mange av dei gamle kisteveitene attkøyrde og jorda er vassjuk. Behovet og etterslepet er etter kvart stort. Også her blir dessverre alternativet meir innkjøpt fôr i staden for å setja bøen i stand.

Dette var nokre moment som Masfjorden BS meiner er viktige å ta med.

Til sist vil me og minna om førespurnaden som me tidlegare har hatt om auka bemanning på «landbrukskontoret». Fordelinga av desse midlane blir ei ny arbeidsoppgåve for kommunen. Me har som sagt tidlegare etterlyst ein auke i den kommunale ressursbruken på dette området og no med nye oppgåver, blir høve til å driva med anna enn dagleg drift (om mogeleg), endå meir redusert. Bed med dette om at kommunen tek tak i dette.

Med helsing

Masfjorden Bonde og Småbrukarlag